



ALL INDIA RADIO

REGIONAL NEWS UNIT – SILCHAR

MORNING NEWS BULLETIN

BENGALI

24 JULY 2024

7:35—7:40 AM IST

দেশের দুঃস্থ মহিলা , যুব প্রজন্ম এবং কৃষক উন্নয়নের বিষয়গুলি এবারের বাজেটে গুরুত্বপূর্ণ বিষয় হিসেবে বিবেচিত হয়েছে । কেন্দ্রীয় অর্থমন্ত্রী নির্মলা সীতারমন গতকাল লোকসভায় ২০২৪-২৫ অর্থ বছরের সাধারণ বাজেট পেশ করে কৃষি , সুক্ষ্ম , ক্ষুদ্র এবং মাঝারী শিল্প , নির্মান এবং পরিকাঠামো ক্ষেত্রের জন্য বিশেষ ব্যবস্থা গ্রহণের কথা ঘোষণা করেছেন ।

চলতি অর্থ বছরের সাধারণ বাজেটে সবার জন্য সুযোগ সৃষ্টির উদ্দেশ্যে ৯টি অগ্রাধিকারের কথা উল্লেখ করা হয়েছে । এই অগ্রাধিকারের ক্ষেত্রগুলি হচ্ছে উৎপাদনশীলতা এবং কৃষিক্ষেত্রে স্থিতিশীলতা , কর্মসংস্থান ও দক্ষতা বিকাশ , সর্বাঙ্গিক মানব সম্পদ উন্নয়ন ও সামাজিক ন্যায় , নির্মান এবং সেবা , নগর উন্নয়ন , শক্তি সুরক্ষা , পরিকাঠামো , উদ্ভাবন , গবেষণা ও উন্নয়ন এবং পরবর্তী প্রজন্মের সংস্কার সাধন ।

বাজেট পেশ করে কেন্দ্রীয় অর্থমন্ত্রী শ্রীমতি সীতারমন বলেন যে প্রধানমন্ত্রী শহরাঞ্চল আবাস যোজনার দ্বিতীয় পর্যায়ের অধীনে ১ কোটি দরিদ্র ও মধ্যবিত্ত শ্রেণীর পরিবারকে বাসগৃহ নির্মান করে দেওয়া হবে ।

অর্থমন্ত্রী ক্যান্সার রোগীদের রেহাই প্রদানের উদ্দেশ্যে আরো ৩ ধরনের ঔষধকে সীমা শুল্কের আওতার বাইরে রাখার কথা ঘোষণা করেন । ব্যক্তিগত আয়করের ক্ষেত্রে অর্থমন্ত্রী জানান যে ৩ লক্ষ টাকা পর্যন্ত বার্ষিক আয়ের ক্ষেত্রে কোন কর প্রযোজ্য হবে না । বার্ষিক ৩ থেকে ৭ লক্ষ টাকা পর্যন্ত আয়কর ৫ শতাংশ , ৭ থেকে ১০ লক্ষ টাকা পর্যন্ত ১০ শতাংশ , ১০ থেকে ১২ লক্ষ টাকা পর্যন্ত ১৫ শতাংশ , ১২ থেকে ১৫ লক্ষ টাকা পর্যন্ত ২০ শতাংশ এবং ১৫ লক্ষ টাকার ওপরের আয়ের ক্ষেত্রে ৩০ শতাংশ কর হবে ।

বাজেটে আসাম সহ অন্যান্য কয়েকটি রাজ্যের বন্যা প্রতিরোধের জন্য আর্থিক অনুদান প্রদানের প্রস্তাবও দেওয়া হয়েছে। অর্থমন্ত্রী বলেন যে আসামে ব্রহ্মপুত্র নদ ছাড়াও অন্যান্য উপনদী গুলি থেকে সৃষ্টি হওয়া বন্যা প্রতিরোধের জন্য প্রয়োজনীয় প্রকল্প গ্রহণ করে আসামকে সাহায্য করা হবে।

প্রধানমন্ত্রী নরেন্দ্র মোদী কেন্দ্রীয় বাজেটে সর্বাঙ্গিক বিকাশ ও সমাজের বিভিন্ন স্তরের লোকেদের উপকৃত করে বিকশিত ভারতের ভিত্তি নির্মাণের বিষয়টি নিশ্চিত করবে বলে মন্তব্য করেছেন। প্রধানমন্ত্রী বলেন যে- এবারের বাজেট নতুন সুযোগ, শক্তি, কর্মসংস্থান এবং স্বাবলম্বনের পথ প্রশস্ত করবে।

এদিকে বিরোধী দল কংগ্রেস এবারের বাজেটকে নিরাশাজনক বলে সমালোচনা করে এই বাজেটে মুদ্রাস্ফীতি ও বেকার সমস্যা সমাধান করার কোনোধরনের পদক্ষেপের কথা উল্লেখ করা হয় নি বলে অভিযোগ করেছে।

লোকসভায় কংগ্রেসের উপ-দলপতি গৌরব গগৈ বাজেটের সমালোচনা করে জানান যে এবারের বাজেটে সরকারের দুর্বলতা প্রতিফলিত হয়েছে। বাজেটে কৃষক, মধ্যবিত্ত এবং বেকার সমস্যা সমাধানে কোন পদক্ষেপ নেই বলে শ্রী গগৈ অভিযোগ করেন।

রাজ্যের শিক্ষামন্ত্রী ডাঃ রণোজ পেগু কাছাড় ও হাইলাকান্দি জেলার দু দিনের সফর সূচী নিয়ে আজ শিলচর আসছেন। মন্ত্রী ডক্টর পেগু আজ দুপুরে শিলচর বিমানবন্দর পৌঁছে বেলা সাড়ে তিনটে নাগাদ শিলচরে জেলা আয়ুক্তের কার্যালয়ের সভাকক্ষে কাছাড়, করিমগঞ্জ ও হাইলাকান্দি জেলার শিক্ষা বিভাগের আধিকারিকদের সঙ্গে একটি পর্যালোচনা বৈঠকে মিলিত হবেন। মন্ত্রী ডাঃ পেগু বিকেলে স্থানীয় সংস্থা-সংগঠন ও বিধায়কদের সঙ্গে মত বিনিময় করবেন।

মন্ত্রী ডাঃ পেগু আগামীকাল সকাল সাড়ে দশটায় হাইলাকান্দির রবীন্দ্র ভবনে সারা আসাম প্রাথমিক শিক্ষক সম্মেলনের ৪৪তম দ্বি-বার্ষিক সম্মেলনে যোগ দিবেন। পরে তিনি শিলচর হয়ে বিমানযোগে গুয়াহাটী ফিরে যাবেন।

হাইলাকান্দি জেলা প্রশাসনের উদ্যোগে আগামী ১৫ই অগাষ্ট যথাযোগ্য মর্যাদায় স্বাধীনতা দিবস পালনের জন্য গতকাল জেলা আয়ুক্তের কার্যালয়ের সভাকক্ষে একটি প্রস্তুতি সভা অনুষ্ঠিত হয়েছে। জেলা আয়ুক্ত নিসাগ হিভারে গৌতমের পৌরহিত্যে আয়োজিত সভায় এবছর স্বাধীনতা দিবসের কেন্দ্রীয় অনুষ্ঠান জেলা ক্রীড়া সংস্থার মাঠে অনুষ্ঠিত করার সিদ্ধান্ত হয়েছে। সভায় স্বাধীনতা দিবসের দিন সকালে দেশাত্মবোধক সঙ্গীতের প্রচার, সরকারী ও বেসরকারী কার্যালয়ে জাতীয় পতাকা উত্তোলন, সাংস্কৃতিক কার্যসূচী ও শোভাযাত্রার আয়োজন করা হবে। এছাড়া শহরে আলোকসজ্জা ও স্বচ্ছতা অভিযানের উপর জোর দেওয়া হবে। গতকালের সভায় শহরের ফুটপাথ দখল মুক্ত অভিযান শুরু করার সিদ্ধান্ত হয়েছে।

হাইলাকান্দি জেলার সরবরাহ বিভাগের দায়িত্বে থাকা অতিরিক্ত আয়ুক্ত এক বিজ্ঞপ্তিতে জানিয়েছেন যে- যাদের ই-শ্রম কার্ডে নাম অন্তর্ভুক্ত রয়েছে, কিন্তু রেশন কার্ড নেই, তারা রেশন কার্ডের জন্য আগামী দশই আগস্টের মধ্যে নিজ নিজ সমবায় সমিতিতে রেশন কার্ডের জন্য আবেদন করতে পারবেন। সঙ্গে তাদের ই-শ্রম কার্ডের প্রতিলিপি সহ খাদ্যসুরক্ষা কার্ডের কপি জমা দিতে বলা হয়েছে। উল্লেখ্য- ২০২১ সালের আগস্ট মাস থেকে ২০২৩ সালের আগস্ট মাসের মধ্যের ই-শ্রম কার্ড যাদের রয়েছে, কেবল তারাই আবেদনের যোগ্য বলে বিবেচিত হবেন।
